



08. august 2010

UKA 2010/41

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Utoqqaat utoqqalinersiat saniatigut sulinikkut aningaasanik isertitsisinnaaneratt pillugu, aningaasat utoqqalinersiat saniatigut isertitassatut killiussat minnerpaamik marloriaamik qaffanneqarsinnaanerannik siunertaq tunngavigalugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Tunngavilersuut

Sulineq nukersornarpallaanngitsoq annertusiartuinnartumik suliffeqarfinni assigiinngitsuni periarfissaaleriartorpoq, nunarsuartinna sulinikkut atugassarititaasut allanngoriartorlutillu nutaaliannngoriartormata. Tamatuma periarfissippaatigut sapinngisamik inuiaqatigiit sulisinnaasut tamarmik sulinissamut periarfissinneqarnissaannik isumatta annerusumik timitalersuiffiginissaanut.

Sulineq inummut sulisinnaassuseqartumut peqqinnartuusoq ilisimavarput, inuup timikkut, tannikkut kiisalu eqqarsartaatsikkut piunassuseqarnerulernerannik pilersitsisarmat. Tamaammatt pisusissamisuuq utoqqaat suli sulisinnaassuseqartut sulerusuttullu annikitsuinnarmik sulisinnaassuseqalersillugit inatsisitigut killiliisimaneq.

Ullumikkut malittarisassat malillugit utoqqalinersiallit kisermaat utoqqalinersiat saniatigut suli akileraarusernagit 56.000 kr.-it tikillugit aningaasarsiaqarsinnaapput, aappariillu 84.000kr.-it tikillugit sulinermikkut aningaasarsiaqarsinnaallutik. Taamatut ilusiliisimaneq utoqqarnut atugassarititaasut pitsaassutsikkut appasinnerpaaffissalernagit, pitsaannerusumik inuuneqarsinnaanerannut killiliisuuvoq.

Utoqqalinersiat saniasigut sulinikkut aningaasarsiarineqarsinnaasunut killiliusseq qaffanneqartariaqarpoq, utoqqalinersiat innarlinngikkaluarlugit ajornanngippat minnerpaamik marloriaatinngortillugit.

Pingaarteqarpoq utoqqalinersiallit sapinngisamik amerlanerpaat suliffeqarfinnut attuumassuteqarnertik attatiinnassagaat qulakkiissallugu. Sulinikkut aningaasarsiarineqarsinnaasut qaffanne-risa kingunerissavaa nunatsinnut inuiaqatigiinnullu akileraarnikkut ajunngitsorsiassannik tunnius-sineq. Aammalu kingunerissavaa utoqqaat qiimanerulernerat nuannaarnerullutillu utoqqaliartor-nerat.

Kalaallit Nunaanni inuuneq tassaasariaqarpoq atorfissaqartinneqartutut misigiffiusoq, kikkut tamarmik nukimmik aallerfigisinnaasaat suleqataaffigisinnaasaallu. Utoqqalinersiaqarneq tassaassanngilaq sulisinnaassutsimik atuinnissamut killiligaaffiusoq. Taamaammat utoqqalinersiallit sulinissaminut pisinnaassusillit aningaasanik killilersorneqarpallaarnerat allanngortinneqartariaqarpoq.

Siunissami ungasissorujussuungitsumi nunatsinni utoqqalinersiaqartut malunnaatilimmik amerlinissaat pissasoq ilisimalereerparput, aamma ilisimareerparput utoqqaat amerlinerat inuit sulinermik inuussutissarsiuteqartut ikinnerulernissaannik malitseqarsinnaasoq.

Pissutsit taamaaliartornerat nunatta aningaasaqarneranut annertuumik siunniuteqartussaavoq. Tamanna utoqqaat ulluinnarni inuuniarnikkut atugaannut ajorseriaateqarfiunngitsumik pissappat kommunit kiisalu Namminersorlutik Oqartussat suleqatigiilluarnissaat pinngitsoorneqarsinnaanngilaq.

Taamaammat nunatsinni sulisinnaasut tamarmik pisariaqartippagut. Sulerusuttut tamarmik periarfissinneqartariaqarput qanoq ukioqarneq apeqqutaatinnagu, inuup pisinnaassuseqarnerminik naliliisinaanera apeqqutaatillugu.

Neriullunga saqqummiussara ilassilluarneqarumaartoq, Inatsisartuni oqallilluarnisarput neriuti-gaara.